

ՏԱՇԻՐԻ ՍՐԱՀԱՎՈՐ ՄԻԱՆԱՎ ՀՈՒՇԱՐՁԱՆՆԵՐԸ

Մ. Մ. ՀԱՍՐԱԹՅԱՆ

Վաղ միջնադարի միանավ եկեղեցիները հայ ճարտարապետության հետաքրքրական և կարևոր հուշարձաններից են: Սակայն դրանք (հատկապես արտաքին սրահ ունեցողները), ի տարբերություն Հայաստանի բազիլիկ և գմբեթավոր կառուցվածքների, համեմատաբար քիչ են ուսումնասիրված: Մասնագիտական գրականության մեջ վերջիններս ներկայացվում են մեկ-երկու օրինակով միայն (Գառնի, Թանահատ, Դվին), որոնք, իհարկե, չեն տալիս հայ ճարտարապետական հուշարձանների այս կարևոր ենթատիպի զարգացման լրիվ պատկերը:

1973 թ. ամռանը ՀՍՍՀ ԳԱ արվեստի ինստիտուտի գիտաընթացում Ստեփանավանի շրջանում ուսումնասիրվեցին արտաքին սրահով մի խումբ միանավ եկեղեցիներ, որոնք բացառիկ արժեքավոր են վաղ միջնադարի հայ ճարտարապետության պատմության համար: Հորինվածքով և կառուցման ժամանակաշրջանով այդ խմբին է պատկանում նաև Օձունի միանավ եկեղեցին: Օձունի և Ստեփանավանի շրջանի միանավ հուշարձանների միջև եղած այս ընդհանրությունը պատահական չէ, քանի որ թե՛ Ստեփանավանի շրջանը և թե՛ Թումանյանի շրջանի հարավային մասը, որտեղ գտնվում է Օձուն ավանը, վաղ միջնադարում մտնում էին պատմական Հայաստանի Գուգարք նահանգի Տաշիր գավառի մեջ, որի կենտրոնը եղել է Օձունը¹:

Օձունի Միրանավոր Ծաղկավանք կոչվող միանավ եկեղեցին (նկ. 1) միշտ գտնվել է իր հուշակավոր հարևանի՝ Օձունի գմբեթավոր բազիլիկայի ստվերում և չի արժանացել մասնագիտական ուսումնասիրության: Այն միայն հիշատակվել և համառոտ նկարագրվել է որոշ աշխատանքներում²:

Եկեղեցին գտնվում է Օձուն գյուղի արևելյան մասում: Հուշարձանը համեմատաբար մեծ չէ (արտաքին չափերն են 8,23×11,90 մ), հատակագիծը ուղղանկյուն է, կազմված երկու անհավասար մասից՝ աղոթասրահից և հյուսիսային կողմին կից սյունասրահից: Մածկը, հարավային ու արևմտյան պատերը, սյունասրահի կեսը քանդված են: Եկեղեցին հիմնականում կառուցված է մաքուր տաշած մուգ-կապտավուն բազալտից ու որձաքարից, իսկ որոշ կառուցվածքային տարրեր իրականացված են դեղնակարմրագույն ֆելզիտից: Աղոթասրահը արևելքից-արևմուտք ձգված թաղակապ դահլիճ է (ներսի չափերն են 3,46×8,23 մ). հատակագծում թեթևակի պայտածև աբսիդով: Վերջինիս կամարը, որը հենվում է պարզունակ տրամատով իմպոստների վրա, շարված է դեղնավուն ֆելզիտի մաքուր տաշած խոշոր քարերից և ունի շեշտված պայտածև ուրվագիծ: Բեմի հատակը աղոթասրահի հատակից բարձր չէ՝ մի հատ-

1 Ս. Ս. Երեմյան, Հայաստանը ըստ «Աշխարհացույցի», Երևան, 1963, էջ 75:

2 Հ. Եղիազարյան, Արևելագու շրջանի կոպտորայի հուշարձանները (ուղեցույց), Երևան, 1952, էջ 38:

կանիշ, որը բնորոշ է Հայաստանի վաղ միջնադարի բոլոր եկեղեցիներին (այդպես է նաև Տաշիրի սրահավոր մյուս հուշարձաններում), Աղոթասրահի (սա թաղակիր կամարներ չի ունեցել) բարձրությունը գերազանցում է լայնությանը մոտ երկու անգամ: Ունեցե՞լ է եկեղեցին արդյոք մուտքեր հարավից և արևմուտքից, դժվար է ասել (այդ հարցին կարելի է պատասխանել մասնակի պեղումներից հետո միայն): Դահլիճի հյուսիսային պատում պահպանվել են երկու մուտք, որոնք բացվում են դեպի սյունասրահը: Մուտքերից արևելյանը ուղղանկյուն բացվածք է, ծածկված միակտոր քարե բարավորով, իսկ արևմուտյանը ավելի մեծ է և ավարտվում է ֆելզիտից իրականացված պայտածե կամարով: Սյունասրահը արևելքից ավարտվում է հատակագծում կիսաշրջանաձև արսիդով, որը դեպի դուրս լուսամուտ չունի և արևելքից կառուցվածքի ողջ հորինվածքի հետ օրգանական ամբողջություն է կազմում: Եկեղեցու երկաստի-



Նկ. 1. Օձունի Միրանավոր Մաղկավանքը հյուսիս-արևմուտքից:

ճան որմնախարիսխը ձգվում է հուշարձանի հարավ-արևելյան անկյունից մինչև հյուսիս-արևելյանը, աղոթասրահն ու արտաքին արսիդը բարձրանում են այս ընդհանուր որմնախարիսխի վրա:

Կամարասրահից պահպանվել են արևելյան կողմի առաջին կամարը և երկրորդի կեսը, որոնք պայտածե են: Հետագայում հուշարձանի այս մասը վերակառուցվել է՝ սրահի արսիդի դիմաց ավելացվել է քառակուսի հատակագծով մի սենյակ, սրահ հյուսիսային պատի շարվածքի մեջ են ներառվել սյունասրահի առաջին երկու կամարները: Սենյակը, որի դուռը արևմուտքից է, իսկ միակ լուսամուտը՝ հյուսիսից, ծածկված է խաչվող թաղերով: Մածկի մշակման այս եղանակը և լուսամուտի շափերն ու պարակալը բնորոշ են XII—XIII դդ. հայ ճարտարապետությանը:

Պահպանված միակ կամարը հնարավորություն է ընձեռում վերականգնելու սյունասրահի նախնական տեսքը. այն եղել է եռակամար, երկու առանձին

կանգնած և երկու կիսասյուններով: Հուշարձանի հյուսիս-արևելյան մասի հետադռնությունը ցույց է տալիս, որ կամարասրահի վերակառուցման ընթացքում վերջինիս ծածկը բարձրացվել է, որի հետևանքով այն կազմել է աղոթասրահի երկթեք տանիքի հյուսիսային լանջի շարունակությունը: Սրահի սկզբունական ծածկի ավելի ցածր լինելու փաստը հավաստվում է նաև եկեղեցու հյուսիսային պատի մեջ պահպանված, միևնույն գծի վրա գտնվող քարե պահունակներով: Սյուսի դրանք շարվածքից պոկված են, սակայն 1946 թ., երբ հուշարձանն առաջին անգամ չափազրվել է (Հ. Հակոբյան), պահունակներից երկուսը դեռ իրենց տեղում են եղել: Պահունակների առկայությունը ապացուցում է, որ սյունասրահի ծածկը եղել է միաթեք, փայտից:

Կառուցվածքի արտաքին արտահայտչականությունը հիմնականում արտահայտվում է հյուսիսային ճակատով: Այն երկաստիճան հորինվածք ունի. առաջինը՝ ավելի ցածրը, ողջ ճակատի երկարությամբ ձգված կամարասրահն էր, որի հետևում բարձրանում է աղոթասրահի ավելի բարձր ծավալը՝ երկթեք ծածկով: Կամարասրահի պայտածե երեք կամարները տեղադրված են ճակատի միջին առանցքին սիմետրիկ: Եկեղեցու դուռը բացվում է միջին կամարի առանցքով, իսկ աղոթասրահից դեպի կամարասրահ տանող կամարակապ մեծ բացվածքը քողարկված է վերջինիս պատի արևմտյան հատվածով: Հուշարձանի ծավալատարածական նման լուծումը ողջ կառուցվածքին տալիս է հավասարակշռված և կայուն տեսք:

Օձունի միանավ եկեղեցին աչքի է ընկնում ճարտարապետական զուսպ ձևերով, դեկորի բացակայությամբ: Հարդարանքի միակ տարրը քիվն է եղել, որից պահպանվել է անկյունի քարը: Քիվը մշակված է պայտածե կամարիկների շարքով, բավական խոր քանդակված, որին հաջորդում է միմյանցից մեկ եռանկյունու չափ շեղված եռանկյունիների երկու շարք: Պայտածե կամարիկների քիվ ունեն Հայաստանի մի շարք հուշարձաններ՝ Օձունի գմբեթավոր բազիլիկան, Մաստարայի, Գառնահովտի, Պտղնիի տաճարները (VI դ. վերջ). Մրենի, Շենիկի, Բջնիի ս. Սարգիս եկեղեցիները (VII դ.): Նմանատիպ քիվերի հետ համեմատական վերլուծությունը ցույց է տալիս, որ Օձունի Միրանավոր Մաղկավանքի միանավ եկեղեցու քիվն այդ տիպի հնագույն օրինակներից մեկն է (շեղտված պայտածություն, կամարիկների մեծ խորություն, լայն միջանկյալ բաժանումներ, ռիթմիկ շարքի ընդգծում, որը ստացվում է ոչ միայն առանձին տարրերի կրկնությամբ, այլև եռանկյունիների երկշարք զարդագոտու միջոցով): Ինչպես իր ողջ հատակագծային ու ծավալատարածական հորինվածքով, այնպես էլ ճարտարապետական ձևերով և շինարարական տեխնիկայով քննվող հուշարձանը պատկանում է հայ ճարտարապետության վաղ շրջանին: Հենց միայն արտաքին սրահում սյուների առկայությունը, որպես առանձին կանգնած կառուցվածքային տարր, վաղ թվագրման ապացույց է³:

Հարդարանքից պահպանված միակ տարրը՝ քիվը հնարավորություն է տալիս ավելի որոշակի թվագրել այս հուշարձանը: Հայ ճարտարապետական հուշարձաններում կամարիկներով քիվ հանդիպում է սկսած VI դ. և լայն տա-

³ Josef Strzygowski, Die Baukunst der Armenier und Europa, Wien, 1918, Band I, p. 86. Այստեղ և հետագայում օգտվել ենք ռուսերեն անտիպ թարգմանությունից, որի օրինակը պահպանվել է ՀՍՍՀ ԳԱ արվեստի ինստիտուտում (այսուհետև՝ Ստրժիգովսկի):

րածում է ստանում VII դ. սկզբում⁴, Հետևաբար, Օձունի միանավ եկեղեցին կարելի է կառուցված համարել VI դ.՝ մի թվագրում, որը համապատասխանում է նրա ճարտարապետական բոլոր առանձնահատկություններին:

Պատմական Տաշիրի արտաքին սրահով, միանավ հուշարձանների մեծ մասը գտնվում է Ստեփանավանի շրջանում: Ընդամենը տասը կմ շառավղով պարփակված տարածության վրա կանգուն են վաղ միջնադարի վեց հուշարձաններ, որոնք մեզ են հասել տարբեր վիճակներով: Հորարձիի և Սվերդլովի ս. Գևորգ եկեղեցիները XIX դ. հիմնովին վերակառուցվել են, Գյուլագարակի Տորմակ եկեղեցին կիսավեր է, իսկ Կուրթանի և Վարդաբլուրի Ջգրաշեն եկեղեցիներն ու Գտեվանքը, ճիշտ է, որոշ չափով վնասված են, սակայն պահպանում են իրենց թե՛ նախնական հորինվածքը և թե՛ հարդարանքի մեծ մասը: Ուսումնասիրությունը ցույց է տալիս այդ հուշարձանների ոչ միայն ժամանակագրական կապը, այլև հորինվածքի և ձևերի նմանությունը: Կուրթանը, Ջգրաշենը և Գտեվանքը միանգամայն անհայտ են մինչ այժմ եղած մասնագիտական գրականության մեջ, իսկ Հորարձիի, Գյուլագարակի և Սվերդլովի եկեղեցիները հիշատակվում են Ա. Սահինյանի և իտալացի ճարտարապետ Պաոլո Կունեոյի աշխատություններում⁵:

Գյուլագարակի Տորմակ, Հորարձիի, Գտեվանքի, Ջգրաշենի, Կուրթանի եկեղեցիները գտնվում են միմյանցից 3—4 կմ հեռավորության վրա: Տարածքային մոտիկությունը նպաստել է, որ շինարարական միևնույն ժամանակաշրջանին պատկանող այդ հուշարձանները միմյանց նման լինեն նաև ճարտարապետական ձևերով: Սակայն միաժամանակ դրանցից յուրաքանչյուրն ունի կառուցող ճարտարապետի անհատականությանը պայմանավորված առանձնահատկություններ: Գտեվանքի, Կուրթանի, Գյուլագարակի եկեղեցիներն ունեն նույն ճարտարապետական հորինվածքը: Դրանցից ամենալավ պահպանվածը Կուրթանի միանավ եկեղեցին է, որը հնարավորություն է տալիս պարզելու ավերված կամ վերակառուցված մյուս երկու հուշարձանների ճարտարապետության նախնական ձևերը:

Կուրթանի եկեղեցին (նկ. 2) գտնվում է գյուղի մեջ, հարթ տարածության վրա: Նրա արևմտյան կողմում XIX դ. կառուցված զանգակատունը, ինչպես նաև հարավային կողմում գտնվող գերեզմանաքարերը վկայում են, որ եկեղեցին վաղ միջնադարից մինչև XIX դ. գործել է, անաղարտ պահպանելով հուշարձանի հորինվածքը: Մասամբ վերանորոգվել են միայն հյուսիսային պատը և տանիքը, որի հետևանքով փոխվել են հյուսիսային և հարավային ճակատների սկզբնական քիվերը: Հուշարձանի հորինվածքը բաղկացած է արևելյան կողմում կիսաշրջանաձև հատակագծով և պայտաձև կամարով բեմի արսիզով ավարտվող աղոթասրահից (5,25×12,80 մ) և եկեղեցու հարավ-արևելյան կողմում գտնվող քառակուսի հատակագծով ավանդատից⁶: Վերջինս ծածկված է խաչվող թաղերով, արևելյան կողմերում ունի կանոնավոր արսիզ և միակ դուռը բացվում է աղոթասրահից՝ բեմի անմիջապես առջևից: Ավանդատան

⁴ Н. М. Токарский, Архитектура Армении IV—XIV веков, Ереван, 1961, стр. 153.

⁵ Ա. Սահինյան, Զովունիի ճարտարապետական խումբը («Լրաբեր», 1968, № 1), «XX Corso di cultura sull'arte Ravennate e Bizantina», Ravenna, 1973.

⁶ Աբսիզում պայտաձև կամարի և կիսաշրջանաձև հատակագծի զուգակցումը հանդիպում է Հայաստանում IV դ.: Կիսաշրջանաձև կամարը նույնպես բնորոշ է վաղ միջնադարի հայ ճարտարապետությանը և կիրառվել է պայտաձևին զուգահեռ:

արևմտյան պատի վրա արտաքուստ կա կիսաշրջանաձև հատակագծով մի ար-
սիզ ևս: Ողջ հուշարձանը, որը բարձրացել է աստիճանաձև որմնախարիսխի
վրա, հիմնականում կառուցված է մշակված որձաքարից, կրաշաղախով: Պա-
տասխանատու հանգույցները՝ որմնամուկները և զույգ թաղակիր կամարները,
պատերի անկյունները, բացվածքների եզրերը իրականացված են մաքուր տաշ-
ված բազալտե քարերից (նույն տեխնիկայով և շինանյութերով են կառուցված
Տաշիրի սրահավոր մյուս հուշարձանները): Եկեղեցին ունի երեք մուտք՝ հյուս-



Նկ. 2. Կուրթանի միանավ եկեղեցին հարավ-արևելքից:

սիսային, հարավային և արևմտյան պատերում: Լուսամուտները, ինչպես վաղ
միջնադարի հուշարձաններում, բավական լայն են և դեպի ներս քիչ են լայնա-
նում: Դրանք հատակից զգալի բարձր են և թվով ինը, որոնցից երեքը գտնվում
են հարավային, երկուսը՝ հյուսիսային, երկուսը՝ արևելյան ճակատներում:
Ջնայած լուսամուտների զգալի բարձրությանը, դրանց կամարները փորված են
միակտոր քարի մեջ: Ավանդատունը լուսավորվում է նաև հարավից, իսկ արև-
մտյան պատի ճակտոնի տակ տեղադրված են զույգ լուսամուտներ, որոնք ի-
րենց ձևով կրկնում են IV—V դդ. հայ ճարտարապետության այնպիսի հուշար-
ձանների համանման բացվածքները, ինչպիսիք են Լեռնակերտի միանավ եկե-
ղեցին, Միծեռնավանքի, Աշտարակի եռանավ բազիլիկաները և այլն:

Դռների բացվածքներն ուղղանկյուն են և ծածկվում են վերևից կիսաշրջ-
անաձև մշակված միակտոր քարի հորիզոնական բարավորով:

Հուշարձանի ինտերյերը, զգալի բարձրության շնորհիվ, բավական վեհ
տպավորություն է թողնում: Այն գերազանցում է աղոթասրահի լայնությանը
ավելի քան երկու անգամ: Ինտերյերի վերասլացության տպավորությունը ու-
ժեղանում է նաև լուսամուտների բարձր տեղադրությամբ, որը պայմանավոր-
ված է արտաքին սրահի առկայությամբ: Կուրթանի եկեղեցին վաղ միջնադա-

րի Հայաստանի այն հազվագյուտ միանավ կառուցվածքներից է, որը պահպանել է իր ծածկի նախնական թաղը (վերջինս քանդված է միայն արևմտյան կողմում)։ Աղոթասրահի պատերը ներսից շարված են մաքուր տաշած քարերով։ Թաղակիր կամարները հենվում են պարզ իմպոստների վրա, որոնց կորագիծ վերջավորությունը պսակվում է սալիկով։ Նման լուծում ունեն նաև ավանդատան աբսիդի կամարի խոյակները և որմնակամարների իմպոստները։ Ավանդատան հյուսիսային պատի շրջանագծի մեջ ներառված հավասարաթև խաչերով քանդակազարդ քարը իր տեղում չէ և այստեղ է ագուցվել վերանորոգման ժամանակ։

Կուրթանի միանավ եկեղեցու արտաքին տեսքը աչքի է ընկնում իր հակիրճ ձևերով և զուսպ դեկորով։ Ինչպես Հայաստանի IV—VII դդ. կառուցվածքներում, այստեղ ևս հարդարանքի միակ տարրերը լուսամուտների և դռների կիսաշրջանաձև պարակալներն ու քիվն են։ Հարավային ու արևմտյան ճակատների լուսամուտների պարակալները մշակված են պայտածե կամարիկներով և դրանց զուգահեռ գնդիկների շարքով։ Հարավային ճակատի լուսամուտների պարակալներն ունեն նաև զալարածե քանդակված միջանկյալ մի այլ զարդագոտի։ Կամարիկների պայտածեությունը խիստ շեշտված է և գրեթե լրիվ շրջանագծի է նման։

Հյուսիսային ճակատի լուսամուտների պսակներից պահպանվել է միայն երկրաչափական զարդաքանդակներով մի քար։ Մուտքերից հարավայինի պարակալի հորինվածքը նման է լուսամուտների պսակներին, իսկ արևմտյանը կամարիկների փոխարեն մշակված է ատամիկներով։ Մուտքերի նման մշակումը տարածված էր վաղ միջնադարյան Հայաստանում (Բագավանի VII դ. գմբեթավոր բազիլիկան, որի հարավային դուռն ունի պայտածե կամարիկներով մշակված կիսաշրջանաձև պարակալ)։ Արտաքին սրահից պահպանված միակ հետքերը հյուսիսային, արևմտյան և հարավային ճակատների քարե պահուսնակներն են, որոնք ունեն կիսազլանիկով մշակված բավական պարզ տրամատ։

Կուրթանի, ինչպես հետո կտեսնենք, նաև Տաշիրի մյուս նույնատիպ հուշարձանների կարևոր առանձնահատկություններից է կանոնավոր, դասական ճակտոնի առկայությունը։ Այստեղ՝ արևմտյան ճակատում լրիվ պահպանվել է ճակտոնի հորիզոնական գոտին, իսկ արևելյանում՝ մի փոքր մասը։ Տիմպանով ճակտոնը հելլենիստական ճարտարապետության վերապրուկների արտահայտությունն է Հայաստանի վաղ քրիստոնեական հուշարձաններում⁷։ Բավական հետաքրքիր է ճակտոնի հորիզոնական քիվի և լուսամուտի պարակալի զուգակցումը, երբ քիվի կամարիկների քանդակազարդ գոտին կիսաշրջանաձև պտտվում է լուսամուտի վերևով։

Արևմտյան լուսամուտի այս պարակալը մշակման եղանակով որոշ չափով տարբերվում է մյուս լուսամուտներից՝ այստեղ պայտածե կամարիկների ծայրերին կից քանդակված են զույգ գնդիկներ։ Նման լուծում ունեն Պտղնիի, Ալամանի, Արթիկի եկեղեցիները, Թալինի Մեծ տաճարը և այլն։

Գյուլագարակի Տորմակ եկեղեցին (նկ. 3) գտնվում է գյուղից մոտ երկու կմ հարավ։ Այն ունի նույն հորինվածքը և գրեթե նույն չափերը, ինչ Կուրթանի

⁷ В. М. Арутюнян и С. А. Сафарян, Памятники армянского зодчества, М., 1951, стр. 38.

եկեղեցին: Այս եկեղեցին վատ է պահպանված: Քանդված են ծածկը, հյուսիսային պատի միջին հատվածը, բեմի արսիդը, պատերի ստորին մասում և լուսամուտների ու մուտքերի եզրերում պոկված են հրեհակամարտության քարերը: Աղոթասրահը ($5,6 \times 12,9$ մ) ղույզ որմնասյուներով բաժանվում է երեք մասի, որոնց վրա հենվել են թաղակիր կամարները: Բեմի արսիդին հարավային կողմից կից է քառակուսի հատակագծով ավանդատունը, որն արևելքից ավարտվում է կիսաշրջանաձև արսիդով: Ավանդատունը և նրա արևելյան պատի դրսից կառուցված բաց արսիդը քանդված են, մնացել են միայն պատերի հիմքերը: Աղոթասրահի հարավային պատի վրա պահպանվել են ավանդատան խաչվող թաղերով ծածկի հետքերը: Հարավային պատի միջին հատվածը թեպետ զուրկ է հրեհակամարտության քարերից և տեղ-տեղ քանդված, սակայն բուսորետոնի միջուկի վրա պահպանվել են ինչպես լուսամուտի, այնպես էլ կամարա-



Նկ. 3. Գյուլագարակի Տորմակ եկեղեցին հարավ-արևմուտքից:

կապ պարակալ ունեցող դռան հետքերը: Հյուսիսային պատի միջին մասը լրիվ է քանդված և հնարավոր չէ որոշել, թե եկեղեցին այդ մասում ունեցել է մուտք կամ լուսամուտ: Արևմտյան ճակատում մուտքը նույնպես քանդված է, սակայն այստեղ ևս դռան ուղղանկյուն բացվածքն ունեցել է կիսաշրջանաձև պարակալ: Արևմտյան ճակատի վերևում պահպանվել է մի կարևոր մանրամաս, որը հնարավորություն է տալիս պարզել Տորմակի եկեղեցու արտաքին հարդարանքի նախնական տեսքը: Դա ճակտոնի հորիզոնական գոտու մի մասն է, որը, ինչպես Կուրթանում, զուգակցված է լուսամուտի պարակալի հետ: Գոտին զարդարված է բավական խոր փորված և խիստ շեշտված պայտաձև կամարիկների շարքով: Եկեղեցու դահլիճից 3 մ հեռավորության վրա պահպանվել են սրահի պատի արևմտյան մասը լրիվ, իսկ հարավային և հյուսիսային թևերից՝ 2—3 մ երկարությամբ հատվածները: Այս պատը կառուցված է շինարարական նույն տեխնիկայով, միևնույն քարով, ինչ և եկեղեցու դահլիճը: Սրահն արև-

մըտյան կողմում, եկեղեցու ընդերկայնական առանցքով ունեցել է մուտք, որը նույնպես քանդված է և քարերը պարագծով պոկված: Սակայն պատի ռուտո-բետոնի միջուկի վրա պահպանված հետքերը ցույց են տալիս, որ մուտքն եղել է կամարակապ մեծ բացվածքի ձևով, 2,5 մ լայնությամբ (ինչպես Օձունի գրմ-բեթավոր բազիլիկայում): Խե ինչպես է շարունակվել սրահը եկեղեցու հյուսիսային և հարավային կողմերում, այժմ դժվար է ասել: Պեղումներից հետո միայն կարելի է պարզել սրահի հորինվածքը (հոծ պատեր, թե՛ սյունասրահ և կամ մույթերով կամարաշար): Հյուսիսային պատի վրա պահպանվել է քարե մի պահուսակ (ցավոք, պահուսակի բարձրությամբ պատի երեսպատումը քանդված է և մյուս պահուսակների հետքերը չեն երևում):


Գյուլագարակից մոտ 6 կմ արևելք, Վարդաբլուր և Կուրթան գյուղերի միջև, խճուղու եզրին գտնվում է այս խմբի մյուս հուշարձանը՝ Գտեվանքը (նկ-



Նկ. 4. Գտեվանքի ընդհանուր տեսքը հարավ-արևմուտքից:

4): Սա իր չափերով ամենափոքրն է (դահլիճի չափերն են ներսից $3,6 \times 6,9$ մ): Հուշարձանը բավական վնասված է: Քանդված են ծածկը, հյուսիսային և հարավային պատերի երեսպատման քարերը: Դահլիճի ինտերյերը մեկ թաղակիր կամարով բաժանվում է երկու հավասար հատվածի (պահպանվել է որմնասյան հետքը հարավային պատում): Դահլիճին հարավից կից է ավանդատունը, որի միակ դուռը բացվում է դեպի աղոթասրահ՝ բեմի անմիջապես առջևից: Ավանդատունն արսիդ շունի, այն արևելքում ավարտվում է ուղղանկյուն հատակագծով և կամարակապ ծածկով մի խորշով: Նրա արևմտյան պատի դրսի կողմից կա գմբեթադղով ծածկված կիսաշրջանաձև հատակագծով մի արսիդ: Եկեղեցին ունեցել է երկու մուտք՝ հյուսիսից և հարավից: Ծրկուսն էլ քանդված են, սակայն նշմարվում է, որ դրանք ևս Տաշիրի նույնատիպ մյուս հուշարձանների նման ունեցել են կամարակապ պարակալով ուղղանկյուն բացվածք: Ան-

կասկած, հուշարձանը լուսամուտներ է ունեցել ընդերկայնական պատերում, բայց պատերի վերին մասերը քանդված են և լուսամուտների հետքեր չեն երևում: Եկեղեցու հարդարանքից պահպանվել է արևմտյան պատում ճակտոնի հորիզոնական դոստու մի քարը միայն, որը բավական է հավաստելու, թե իր հարդարանքով, ինչպես և արտաքին արտահայտչականությամբ Գտեվանքը կրկնում է Տաշիրի վերը նշված հուշարձանների ճարտարապետական ձևերը (քիվը նույնպես մշակված է շրջանագծի հասնող խիստ պայտածե կամարիկների շարքով): Գտեվանքի արևմտյան կողմում, դահլիճից 2,6 մ հեռու մնացել է արտաքին սրահի պատի մի մասը: Սակայն այստեղ, ի տարբերություն Գյուլազարակի, սրահն արևմուտքից դուռ չի ունեցել: Սրահը հավանաբար ունեցել է փայտե ծածկ, որովհետև դահլիճի արևմտյան պատի վրա, դրսից կան քարե երեք պահուսնակներ:



Նկ. 5. Վարդաբլրի Ջգրաշեն եկեղեցին հարավ-արևմուտքից:

Ստեփանավանի շրջանի Հոբարձի գյուղում և Վարդաբլուր գյուղից մոտ 2 կմ հյուսիս կանգուն են միեկնույն հորինվածքով երկու հուշարձաններ: Սակայն եթե Հոբարձի եկեղեցին XIX դ. հիմնովին վերանորոգվել է, որի ընթացքում զգալի աղավաղվել են նրա ճարտարապետական ձևերը, ապա Ջգրաշենը, թեպետ և կիսավեր, անաղարտ պահպանել է իր հորինվածքը և նույնիսկ, որ շատ կարևոր է, հարդարանքը: Այս պատճառով Ջգրաշենը հնարավորություն է տալիս վերականգնելու Հոբարձի եկեղեցու նախնական տեսքը և հատակագիծը:

Ջգրաշենը (նկ. 5) կառուցված է Զորագետի վտակի ափին, բարձրադիր մի հարթակի վրա: Հուշարձանի պատերը բավական խարխուլ վիճակում պահպանվել են համարյա ողջ բարձրությամբ: Արևմտյան ճակատը անջատվել է երկայնական պատերից, որոնք իրենց հերթին զգալի վնասված են: Ողջ պարագծով պտտվում է մեկ-երկու շառքից բաղկացած մի գոտի, որն իրականացված

է դեղնա-կարմրավուն ֆելզիտից, նրկաստիճան որմնախարիսխի վրա բարձրացող դահլիճն ունի նույն համաչափությունները, ինչ և Տաշիրի մյուս նույնատիպ հուշարձանները՝ այն բավական ձգված է արեւելքից արեւմուտք և լայնությունը հարաբերում է երկարության ինչպես 1:2,4: Ջգրաշենի հատակագիծն ունի նույն սխեման, ինչ Կուրթանը, Գյուլադարակը, Գտեվանքը, սակայն մի տարբերությամբ՝ այստեղ հյուսիսային կողմին կից ավանդատնից և բաց արևելքից բացի, հարավային կողմում նույնպես կառուցվել է բաց արևելք, որի արեւմտյան պատն ընդհանուր է դահլիճի և հյուսիսային ավանդատան (վերջինս ծածկված է խաչվող թաղերով) համապատասխան պատերի հետ: Այս տարբերությունը ընդգծում է ճարտարապետի ձգտումը՝ հնարավորին չափ համաչափ հորինվածք ստեղծել ընդերկայնական առանցքի շուրջը, հավասարակշռելու այն լարված ու ասիմետրիկ ծավալա-տարածական հորինվածքը, որը կա Գյուլադարակում, Կուրթանում և Գտեվանքում: Ջգրաշենն ունի երեք մուտք՝ երկայնական պատերում և արեւմուտքում: Թեպետ մուտքերը եզրագծով քանդված են, սակայն երևում է, որ դրանք ունեցել են ուղղանկյուն բացվածքներ, ընդ որում հարավայինը պսակվել է կիսաշրջանաձև պարակալով: Լուսամուտները քիչ են՝ երկուսը հարավային պատի վրա, մեկը արեւմտյանում, իսկ մյուս երկուսը՝ արեւելյանում (բեմինը և ավանդատանը):

Լավ է պահպանվել արեւմտյան լուսամուտը, որի կամարակապ վերջավորությունը, ի տարբերություն Կուրթանի, իրականացված է երեք քարից: Եկեղեցու դահլիճը ($5,60 \times 13,17$ մ) երկու զույգ որմնամույթերով բաժանված է երեք մասի: Դահլիճի լայնության և բարձրության հարաբերությունը (ներսում) Տաշիրի մյուս հուշարձանների համեմատ մեծ չէ: Եթե Կուրթանում և կամ Օձունի միանավ եկեղեցում այն կազմում է 1:2 և ավելին, ապա այստեղ հարաբերությունը հավասար է 1:1,7 (ճիշտ է, եկեղեցու ծածկը չի պահպանվել, սակայն թաղի սկզբից մինչև հատակը 6,6 մ է, հետևաբար, դահլիճի բարձրությունը ներսում եղել է 9,4—9,5 մ):


Արտաքին պատերում պահպանվել են բազալտից պահուսակներ, որոնք տեղադրված են ֆելզիտե շարվածքի գոտում: Դրանք ունեն տարբեր տրամադրություն և մեծ մասամբ մշակված են կիսագլանիկով ու սալիկով: Սակայն կան նաև փնդանակերպ քանդակներով պահուսակներ. հյուսիսային պատի պահուսակներից մեկի վրա, օրինակ, մեծ վարպետությամբ քանդակված է խոյի գլուխ, մյուսի վրա՝ ոչխարի ոճավորված գլուխ, իսկ հյուսիսային պատին պատկերված է եղջերու: Պահուսակների այսպիսի քանդակազարդումը բացառիկ է վաղ միջնադարի Հայաստանի հուշարձաններում: Ընդհանրապես Ջգրաշենի հարդարանքից պահպանված բեկորները մեծ հետաքրքրություն են ներկայացնում V—VII դդ. հայ ճարտարապետական զարդաքանդակների զարգացման պատմության համար: Հարավային պատի արեւելյան կողմի լուսամուտի պարակալն ունի բուսական մոտիվներով քանդակ՝ խաղողի որթի գալարների մեջ գտնվող եռաթերթ և բազմաթերթ տերևներով: Այն ոճավորված է, կատարված փոքր խորությամբ և զուրկ է VII դ. համանման քանդակներին հատուկ պլաստիկացից: Սակայն, անկախ այս բոլորից, պարակալը զգալի աշխուժացնում է կառուցվածքի հարավային ճակատը, որովհետև տվյալ կողմնորոշման դեպքում պատի հարթությունից քիչ դուրս ցցված քանդակները նույնպես ստեղծում են լույս ու ստվերի ուժեղ խաղ: Արեւմտյան ճակատի հարդարանքը տարբերվում է Կուրթանի և Գյուլադարակի եկեղեցիների հարդարանքից: Այստեղ ամենա-

կարևորն այն է, որ ճակտոնի հորիզոնական գոտին ոչ թե արևմտյան լուսամուտի պարակալի հետ մեկ ամրոցաբերություն է կազմում, այլ լուծված է առանձին՝ ալն ընդհատվում է պարակալի կիսաշրջանաձև մասով: Ճակտոնի տիմպանի այսպիսի լուծումն, իր արտահայտչականությամբ, զգալի զիջում է Կուրթանի ու Գյուլագարակի եկեղեցիների ճակտոններին: Արևմտյան ճակատի գեղարվեստական մշակումը կորցրել է իր ամբողջականությունը, հստակությունը և Տաշիրի մյուս հուշարձաններում կիրառված հնարքից հրաժարվելը այստեղ պետք է համարել կառուցողի ստեղծագործական անհաջողությունը: Թե՛ լուսամուտի պարակալը և թե՛ ճակտոնի քիվը մշակված են պայտաձև կամարիկներով: Սակայն Զգրաշենում Տաշիրի տիպարային այս մոտիվը ունի մի քիչ այլ ձև: Քիվի կամարիկների միացման անկյուններում քանդակված են եռանկյունիներ, իսկ պարակալի ձվաձև ուրվագիծ ունեցող կամարիկների շարքին զուգահեռ, վերևից կա նշտարաձև տերևների քանդակներով մշակված մի երկրորդ գոտի ևս: Նշտարաձև տերևներ հանդիպում են Հայաստանի V—VII դդ. հուշարձաններում, որոնցով զարդարված են լուսամուտների բարավորները և նույնիսկ խոյակներ (Գառնիի, Ագարակի, Անիի միանավ եկեղեցիները, Արուծի տաճարը և այլն):

Հոբարձիի եկեղեցին իր հորինվածքով կրկնում է Զգրաշենին: Միայն այստեղ ավանդատունը շինությունը ոչ թե կից է հյուսիսից, այլ հարավից: XIX դ., վերակառուցման ընթացքում, քանդակ է ավանդատունը և նրա արևմտյան պատի բաց աբսիդը, որոնց հետքերն են երևում միայն գետնի երեսին: Փակվել է արևմտյան մուտքը, վերաշարվել պատերի մեծ մասը, այժմյան լուսամուտները նույնպես նախնականը չեն: Հոբարձիի եկեղեցին ավելի կարճ է (համապատասխանաբար 18,10 և 16,60 մ): Այդ պատճառով ազոթասրահը, որը զույգ թաղակիր կամարներով նույնպես բաժանվում է երեք մասի, ավելի քիչ է ձգված: Մուտքերը ևս երեքն են՝ երկայնական պատերում և արևմուտքում: Ավանդատունը հաղորդակցվել է դահլիճին բեմի առջևից բացվող դռնով: Թեպետ նշարվում են ավանդատան պատերի հիմքերը միայն, սակայն պարզ է, որ այն ծածկվել է գլանաձև թաղով, քանի որ եկեղեցու հարավային պատում պահպանվել է այդ թաղի առաջին շարքը: Արտաքին սրահից մնացել են եկեղեցու հյուսիսային և հարավային պատերի պահուսնակները և նրանց հետ միևնույն բարձրության վրա գտնվող երեք քառորդանի խոյակ: Պահպանվել է նաև հյուսիսային դռան շքամուտքը: Դռան ուղղանկյունաձև բացվածքը ավարտվում է վերևից կիսաշրջանաձև ուրվագիծ ունեցող բարավորով: Մուտքը ձևավորված է ճակտոնով ավարտվող սյունազարդ պորտալով, որի կիսասյուների խոյակները մշակված են պայտաձև կամարիկներով: Հուշարձանի ներսում գտնվում է հարդարանքի մի բեկոր ևս՝ լուսամուտի պարակալի հորիզոնական հատվածը: Նրա վրա քանդակված է շրջանագծի մեջ ներգծված երեք հավասարաձև խաչ: Քանդակը բավական նուրբ է և իր կատարման ոճով նման է Կուրթանի հյուսիսային ճակատի լուսամուտներից մեկի պարակալին:

Պատմական Տաշիրի այս խմբի հուշարձանների շարքին է պատկանում նաև Ստեփանավանի շրջանի Սվերդլով գյուղի ս. Գևորգ եկեղեցին (նկ. 6), որը գտնվում է գյուղի հյուսիսային եզրի բարձրագույն վայրում և նույնատիպ հուշարձաններից ամենամեծն է (երկարություն է 21,61 մ): Անցյալ դարում այս հուշարձանը հիմնովին վերանորոգվել է: Հարավային և արևմտյան պատերը երեսպատվել են սրբատաշ բազալտով, վերաշարվել են մյուս պատերի

զգալի մասերը, քիվը և կղմինդրե տանիքը նույնպես նորոգման արդյունք են: Փոխվել են նաև լուսամուտները, որոնք երկայնական պատերում լայնացել են և դարձել տարբեր չափերի: Վերակառուցվել են ավանդատները. դա պարզորոշ երևում է հյուսիսային ավանդատան արևմտյան պատից, որտեղ նախնական արտաքին արտիդը կիսով չափ մնացել է վերակառուցված արևմտյան պատի մեջ, XIX դ. հարավային ճակատին կից, մուտքի դիմաց, կառուցվել է երկաստիճան զանգակատուն:




Նկ. 6. Սվերդլովի ս. Գեորգ եկեղեցու ընդհանուր տեսքը:

Հուշարձանի հարավային և արևմտյան ճակատներում պահպանված բազմաստիճան որմնախարիսխը վկայում է, որ վերանորոգման ժամանակ շենքի հիմնական ծավալը և հատակագծային հորինվածքը չեն փոխվել: Ս. Գեորգը, պատկանելով Տաշիրի սրահավոր հուշարձանների տիպաբանական խմբին, իր ընդհանուր հորինվածքով միաժամանակ տարբերվում է նրանցից: Այստեղ ողջ կառուցվածքը սիմետրիկ է ընդերկայնական առանցքի նկատմամբ (ավանդատներ կան բեմի երկու կողմերում): Ստացվել է հավասարակշռված ծավալա-տարածական հորինվածք, որը կազմավորվել է արևելք-արևմուտք առանցքի շուրջը, ինչպես բազիլիկաներում: Համաչափություններով նույնպես այն նման է բազիլիկ կառուցվածքներին՝ դահլիճի լայնության և երկարության հարաբերությունն արդեն հավասար է 1:3 (Տաշիրի մյուս հուշարձաններում այն տատանվում է 1,9-ից մինչև 1:2,4): Նեղ ու ձգված դահլիճը չորս զույգ թաղակիր կամարներով և որմնամույթերով բաժանվում է հինգ հատվածի, որը ինտերյերում որոշակի դիրք է ստեղծում: Ազոթասրահը հիշեցնում է եռանավ բազիլիկաների միջին նավը նաև իր զգալի բարձրությամբ:

Ավանդատները միևնույն լայնության են, բայց տարբեր երկարությամբ, որը վերակառուցման հետևանք է: Այդ պատճառով վերացել են նաև արտա-

քին արսիղները, որոնցից միայն հյուսիսայինի մի մասն է տեղում պահպանվել։ Ավանդատները թաղածածկ են և արևելքից ավարտվում են արսիղով։ Հյուսիսայինի արսիղն ունի կիսաշրջանաձև հատակագիծ և պայտածե կամար, իսկ հարավայինի թե՛ հատակագիծը, թե՛ կամարը շեշտված պայտածե են։

Հուշարձանի հարդարանքից համարյա ոչինչ չի պահպանվել։ Խնտերյերն ամբողջությամբ սվաղված է։ Թաղակիր կամարների իմպոստները պարզ են, այդ ժամանակաշրջանին բնորոշ սալիկավոր, որը կորագիծ վերջավորությամբ ձուլվում է որմնամույթին։ Բեմի լուսամուտի պարակալը նախնականը չէ։ Դռներն ունեցել են շքամուտքեր, որոնցից արևմտյանի հետքերն են պահպանվել, հյուսիսայինի կիսասյուները, իսկ հարավայինի զույգ կիսասյուները՝ վրան հանգչող կամարով։



Նկ. 7. Տաշիրի սրահավոր միանավ հուշարձանները։

Տաշիրի այս հուշարձաններն իրենց հատակագծային-ծավալային հորինվածքով ու մանրամասներով միևնույն ժամանակաշրջանի (VI դ.) և միևնույն ճարտարապետական դպրոցի արդյունք են (նկ. 7)։

Արտաքին սրահով միանավ հուշարձաններ հանդիպում են նաև պատմական Այրարատում և Սյունիքում։ Առավել բնորոշ և զրականության մեջ հայտնի սյունասրահով միանավ կառուցվածքը Թանահատի եկեղեցին է, որը զբո-

ներվում է Սիսիանի շրջանի Արեհիս գյուղից հյուսիս, լեռան լանջի եռանկյունաձև հարթակի վրա: Այն ավերակ է, պահպանվել են արևմտյան և հյուսիսային պատերը, հարավային պատի արևմտյան հատվածը, ավանդատունը և բեմի կամարը: Աղոթասրահը (6,70×13,5 մ) ավարտվում է խիստ շեշտված պայտածև հատակագծով և ատամաշարով զարդարված կամարավոր աբսիդով: Վերջինից դուռ է բացվում դեպի հարավից կից, սեղանաձև հատակագծով թաղածածկ ավանդատունը, որը բավական մոտ տեղադրված լինելով աբսիդին, իր թաղի վրա է կրում հարավային պատի մի մասը: Ավանդատունը կառուցված լինելով դահլիճի հետ, նրա օրգանական ամբողջությունն է կազմում, որը պարզորոշ երևում է շինության արևելյան ճակատում: Սյունասրահից մընացել են սյունների բները և խոյակները: Եկեղեցու միակ պահպանված մուտքը հարավից է՝ սրահի միջից: Այս կողմից կան նաև լուսամուտի հետքեր: Արևմտյան ճակատը լրիվ փլված է և դժվար է ասել՝ այստեղից մուտք եղել է, թե ոչ: Պահպանվել է քիվի ատամնաշարավոր անկյունային բեկորը: Քիվը, հնաճ ջանդակներով մշակված սյունասրահի խոյակները և բեմի կամարի իմպոստները, ինչպես և ողջ հորինվածքը վկայում են հուշարձանի Հայաստանում քրիստոնեության տարածման առաջին տարիներին պատկանելը⁸: Մասնագիտական գրականության մեջ Թանահատը թվագրվում է V—VI դդ.: Սակայն նրա կառուցման թվականը, ըստ շինարարական արձանագրության (որից այժմ բեկորներ են միայն տեղում պահպանվել), որոշակի նշում է Ստեփանոս Օրբելյանը. «Բայց դառաք յիւրոց արձանագրութեանցն եթէ 400 ամաւ յառաջ շինեցաւ եկեղեցին քան զհայ թուականն, յիշխանացն Սիւնեաց յանուն սրբոյ նախավկային Ստեփաննոսի»⁹: Օրբելյանի այս տեղեկությունը տարակուսանք է առաջացրել հետազոտողների մոտ, որովհետև Թանահատի եկեղեցու կառուցումը 151 թ.՝ մինչև քրիստոնեության տարածումը Հայաստանում, հավանական չէ: Սակայն Ալիշանը լուծել է այդ առեղծվածը: Նա գրում է, որ Օրբելյանի տեքստում արտադրությունների ժամանակ սխալ է սսլրդել և պատմիչի մոտ ոչ թե Ն (400) է եղել, այլ իր գրելաձևով վերջինիս նման միակ տառը՝ Կ(60), որի դեպքում միայն Թանահատը կարող է կառուցված լինել Հայաստանում քրիստոնեություն ընդունելուց (301) մինչև «հայոց թվականը» (551) ընկած ժամանակամիջոցում¹⁰: Եվ իրոք, Թանահատի թվագրումը 491 թ. միանգամայն համապատասխանում է նրա ճարտարապետական առանձնահատկություններին:

Ենթադրվում է, որ Հայաստանի IV—V դդ. հուշարձաններից արտաքին սրահ ունեցել են Գառնիի, Եղվարդի, Կառնուտի, էջմիածնի միանավ եկեղեցիները¹¹: Ըստ Վ. Հարությունյանի և Գ. Քոչոյանի հյուսիսային կողմից կամարասրահ է ունեցել նաև Դվինի Յիզտբուգիտի վկայարանը (553—555 թթ.)¹²:

⁸ В. М. Арутюнян и С. А. Сафарян, Памятники армянского зодчества, М., 1951, стр. 38

⁹ Մտ. Օրբելյան, Պատմություն նահանգին Սիսական, Թիֆլիս, 1912, էջ 160:

¹⁰ Ալիշան, Սիսական, Վեներիկ, 1893, էջ 251:

¹¹ A. Khatchatrian, L'architecture Arménienne du IV au VI siècle, Paris, 1971, p. 36—43.

¹² Կ. Ղաֆադարյան, Դվին քաղաքը և նրա պեղումները, Երևան, 1952, էջ 108, Վ. Հարությունյան, Դվինի V—VII դդ. ճարտարապետական հուշարձաններ, Երևան, 1950, էջ 81:

Բաց արսիղներով ավարտվող արտաքին սրահ ունեն V դ. եռանավ բազիլիկաներից Երերույքը, Դվինը և Տեկորի գմբեթավոր բազիլիկան: Վերջին երկուսը սյունասրահով շրջապատված են եղել երեք կողմից, իսկ Երերույքն արևմուտքից ունի նարտեքս: Արսիղավոր այս սրահները ծառայել են մի քանի նպատակների համար: Խոշոր տոների, հանդիսությունների ժամանակ դրանք եղել են լրացուցիչ, օժանդակ տարածություն՝ հավաքված մեծ ամբոխին պատսպարելու համար¹³: Ենթադրվում է, որ ինչպես սիրիական եկեղեցիներում, Հայաստանում ևս սովորական օրերին ծխակատարությունների համար օգտագործվել են միայն սրահները¹⁴: Գոյություն ունի նաև այն տեսակետը, որ արտաքին սյունասրահները վաղ միջնադարում նախատեսված են եղել ապաշխարողների համար¹⁵: Եթե նկատի ունենանք, որ հայ եկեղեցին, որպես Նիկիայի տիեզերական առաջին ժողովի (325 թ.) մասնակից, պետք է ընդունի բոլոր եկեղեցիների համար պարտադիր ապաշխարողների վերաբերյալ օրենքը, ապա Հայաստանում արտաքին սյունասրահների կառուցման անհրաժեշտությունը պետք է երևան եկած լինի IV դ. երկրորդ քառորդում¹⁶: Արտաքին սրահները Հայաստանում համեմատաբար լայն տարածում ստացան V դ. և VI դ. առաջին կեսում: Իսկ նրանց կառուցման անհրաժեշտությունը, ըստ երևույթին, վերացավ VI դ. վերջին քառորդում¹⁷:

Ինչպես տեսանք, վաղ միջնադարյան Հայաստանում արտաքին սրահով միանավ կառուցվածքները բավական տարածված են եղել: Հնարավոր է, որ վերը նշված հուշարձաններով չի սպառվում նրանց քանակը: Արտաքին սրահով միանավ եկեղեցիներ տարածված էին նաև հյուսիսային Սիրիայում, ուր վաղ միջնադարում երևան են եկել սյունասրահով շրջապատված ընդլայնական տիպի միանավ կառուցվածքներ¹⁸: Ըստ Ստրոնգոմսկու, երկայնական տիպի (հելլենիստական) միանավ եկեղեցիներից լայնականի (արևելյան) անցումը տեղի է ունեցել V—VI դդ., ընդ որում այդ տիպի հայ ճարտարապետության հուշարձաններին ծանոթ չլինելով (այն ժամանակ դեռ հայտնի չէր և Թանահատը), նա գտնում է, որ Հայաստանում գոյություն չունի անցման միջանկյալ աստիճան¹⁹: Սակայն Տաշիրի միանավ հուշարձանները հենց այդ պակաս օղակներն են, որ լրացնում են ճարտարապետական այս հետաքրքրական տիպի զարգացման պատմությունը: Միևնույն ժամանակ դրանք այն հուշարձաններն են, որոնցում բացահայտ երևում է անցումը Հայաստանի IV—V դդ. ճարտարապետական ձևերից դեպի VII դ. «դասական» ձևերը: Հենց սրանում է Տաշիրի արտաքին սրահավոր կառուցվածքների կարևոր նշանակությունը հայ ճարտարապետության պատմության համար:

13 Ղ. Փ ա ր պ ե ց ի, Պատմութիւն հայոց, Թիֆլիս, 1907, էջ 394:

14 Ս տ ր ժ ի գ ո վ ս կ ի, էջ 859:

15 «Ակնարկ հայ ճարտարապետության պատմության», Երևան, 1964, էջ 95:

16 Ա լ ե ք ս ա ն դ ր Ս ա հ ի ն յ ա ն, Քասաղի բազիլիկայի ճարտարապետությունը, Երևան, 1955, էջ 120:

17 Նույն տեղում:

18 Georges Tchalenko, Village antiques de la Syrie du Nord, Paris, 1953, t. I, pl. XIII.

19 Ս տ ր ժ ի գ ո վ ս կ ի, էջ 865:

ТАШИРСКИЕ ОДНОНЕФНЫЕ ПАМЯТНИКИ С ГАЛЕРЕЕЙ

М. М. АСРАТЯН

Резюме

В 1973 г. в Степанаванском и Туманянском районах был обмерен и изучен ряд неизвестных в научной литературе памятников архитектуры Армении раннего средневековья. Однонефные церкви с галереей Цирнавор Цахкаванк Одзуна, Гтеванк, Куртан, Тормак Гюлагарака, Обардзи, Джграшен Вардаблур, св. Геворк села Свердлова, благодаря оригинальной интерпретации этой известной композиции и самобытному декору, имеют важное значение в истории армянской архитектуры. Сравнительный анализ с однотипными сооружениями Армении и соседних с ней стран позволяет датировать новоявленные памятники исторического Ташира первой половиной VI в.